

ՄՐՅԱԿՑՈՒԹՅԱՆ ՊԱՇՏՊԱՆՈՒԹՅԱՆ ՀԱՆՁՆԱԺՈՂՈՎ

Գ Լ Խ Ա Վ Ո Ր Ք Ա Ր Տ ՈՒ Ղ Ա Ր

Հայաստանի Հանրապետություն, 0010, ք. Երևան, Տիգրան Մեծ 4, հեռ.՝ (+374 60) 830 840, (+374 60) 830 850
Էլ-փոստ՝ info@competition.am, վեբ կայք՝ //www.competition.am

« 03 » 03 2022 թ.

No ԼԽՎ - 957

«ՏՈՒՄՈՆ» ՍԱՀՄԱՆԱՓԱԿ
ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ ՏՆՕՐԵՆ
ՊԱՐՈՆ ԶԱՆԻԲԵԿ ԹՈՎՄԱՍՅԱՆԻՆ
(հասցե՝ ք. Երևան, Մալաթիա-Սեբաստիա, Անդրանիկի, 4, 8)

Հարգելի՛ պարոն Թովմասյան,

Մրցակցության պաշտպանության հանձնաժողովը (այսուհետ՝ Հանձնաժողով) 2022 թվականի մարտի 1-ի ««Տումոն» սահմանափակ պատասխանատվությամբ ընկերության կողմից տնտեսական մրցակցության բնագավառում իրավախախտման վերաբերյալ վարույթ հարուցելու մասին» թիվ 80-Ա որոշմամբ (այսուհետ՝ թիվ 80-Ա որոշում) հարուցել է թիվ ՀԳ-00061/22 վարույթը:

«Տումոն» սահմանափակ պատասխանատվությամբ ընկերության (այսուհետ՝ Ընկերություն) լավաճ լինելու իրավունքն իրացնելու նպատակով Ընկերությունը կարող է երկշաբաթյա ժամկետում Հանձնաժողով ներկայացնել գրավոր դիրքորոշում և այն հիմնավորող նյութեր հարուցված վարույթում քննարկվող հարցի վերաբերյալ: Ընկերության հիմնավոր միջնորդության հիման վրա երկշաբաթյա ժամկետը Հանձնաժողովի նախագահի գրությամբ կարող է երկարաձգվել մինչև երկշաբաթյա ժամկետով:

Տեղեկացնում ենք, որ.

1. «Նորմատիվ իրավական ակտերի մասին» օրենքի 31-րդ հոդվածի 2-րդ մասի համաձայն՝ տարիներով, ամիսներով կամ օրերով հաշվարկվող ժամկետների ընթացքն սկսվում է այն օրացուցային տարվա, ամսվա, ամսաթվի կամ վրա հասած իրադարձությանը հաջորդ օրվանից, որով որոշված է դրա ժամկետի սկիզբը:

2. Ընկերությունը թիվ 80-Ա որոշումն ստանալու օրվանից երկշաբաթյա ժամկետում Ընկերությանը վերագրվող իրավախախտման փաստն ընդունելու և իրավախախտման հետևանքները վերացրած լինելու դեպքում կարող է արագացված վարույթ կիրառելու մասին միջնորդություն ներկայացնել Հանձնաժողով, ընդ որում, արագացված վարույթի կիրառման արդյունքում պատասխանատվության միջոց կիրառելիս պատասխանատվության միջոցը չի կարող գերազանցել տվյալ իրավախախտման համար նախատեսված ամենախիստ պատասխանատվության միջոցի մեկ երկրորդը:

3. «Տնտեսական մրցակցության պաշտպանության մասին» օրենքի 94-րդ հոդվածի 1-ին մասի համաձայն՝ պատասխանատվության միջոց կիրառելիս Հանձնաժողովը հաշվի է առնում տվյալ իրավախախտման բնույթը, տևողությունը, իրավախախտման հնարավոր կամ փաստացի ազդեցությունը շուկայում մրցակցային իրավիճակի կամ սպառողների շահերի վրա, տնտեսավարող սուբյեկտի կողմից տվյալ խախտման կրկնակիությունը, եթե նախորդ խախտման համար պատասխանատվության միջոց կիրառելու օրվանից չի անցել հինգ տարի, տնտեսավարող սուբյեկտի դիտավորության աստիճանը, տնտեսավարող սուբյեկտի կողմից իրավախախտում կատարվելու շարժառիթները և հանգամանքները, տնտեսավարող սուբյեկտի կողմից իրավախախտում կատարվելու փաստն ընդունելու կամ Հանձնաժողովի հետ համագործակցելու հանգամանքը, պատասխանատվությունից ազատելու հիմքերը, տնտեսավարող սուբյեկտի վրա նշանակվող տուգանքի հնարավոր ազդեցությունը, տվյալ տնտեսավարող սուբյեկտի գործունեության ոլորտը և տնտեսավարող սուբյեկտի պատմությունը: Ընդ որում, «Վարչարարության հիմունքների և վարչական վարույթի մասին» օրենքի 43-րդ հոդվածի համաձայն՝ Ընկերության համար բարենպաստ հանգամանքների ապացուցման բեռը կրում է Ընկերությունը:

4. Պատասխանատվության միջոցի ընտրությունը և տուգանքի հաշվարկումն իրականացվում է Հանձնաժողովի 2021 թվականի դեկտեմբերի 28-ի թիվ 395-Ն որոշմամբ սահմանված մեթոդաբանությամբ:

Կից ներկայացվում է թիվ 80-Ա որոշման պատճենը:

Առդիր՝ «4» թերթ:

ՀԱՐԳԱՆՔՈՎ՝



ԱՇՈՏ ՎԱՀԱՆՅԱՆ

Կապարող՝ Արմենուհի Թադևոսյան
Անբարեխիղճ մրցակցության վերահսկողության վարչություն
Հեռ. (+374 60) 830-840 (245)



ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ ՄՐՑԱԿՑՈՒԹՅԱՆ ՊԱՇՏՊԱՆՈՒԹՅԱՆ ՀԱՆՁՆԱԺՈՂՈՎ

Ո Ր Ո Շ ՈՒ Մ

1 մարտի 2022 թվականի թիվ 80-Ա

«ՏՈՒՄՈՆ» ՍԱՀՄԱՆԱՓԱԿ ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ ԿՈՂՄԻՑ ՏՆՏԵՍԱԿԱՆ ՄՐՑԱԿՑՈՒԹՅԱՆ ԲՆԱԳԱՎԱՌՈՒՄ ԻՐԱՎԱԽԱՆՏՄԱՆ ՎԵՐԱԲԵՐՅԱԼ ՎԱՐՈՒՅԹ ՀԱՐՈՒՑԵԼՈՒ ՄԱՍԻՆ

Մրցակցության պաշտպանության հանձնաժողովը (այսուհետ նաև՝ **Հանձնաժողով**) 2022 թվականի մարտի 1-ի նիստում, քննարկելով «Տումոն» սահմանափակ պատասխանատվությամբ ընկերության (այսուհետ նաև՝ **Ընկերություն**) կողմից տնտեսական մրցակցության բնագավառում իրավախախտման վերաբերյալ վարույթ հարուցելու մասին հարցը,

Պ Ա Ր Զ Ե Ց

Աշխատանքի և սոցիալական հարցերի նախարարությունը (այսուհետ նաև՝ **Նախարարություն**) 2022 թվականի փետրվարի 11-ին Հանձնաժողով է ներկայացրել գրություն՝ հայտնելով, որ Նախարարության կողմից հայտարարվել են Նախարարության ենթակայությանը հանձնված պետական ոչ առևտրային կազմակերպությունների 2022 թվականի կարիքների համար սննդամթերքի, տնտեսական, սանիտիկային և մաքրիչ նյութերի կենտրոնացված կարգով ձեռքբերման՝ «ԱՍՀՆ-ՊՈԱԿ-ԷԱՃԱՊԶԲ-22/3-Գ-1», «ԱՍՀՆ-ՊՈԱԿ-ԷԱՃԱՊԶԲ-22/3-Գ-2», «ԱՍՀՆ-ՊՈԱԿ-ԷԱՃԱՊԶԲ-22/3-Գ-3», «ԱՍՀՆ-ՊՈԱԿ-ԷԱՃԱՊԶԲ-22/3-ԳԵՏ-1», «ԱՍՀՆ-ՊՈԱԿ-ԷԱՃԱՊԶԲ-22/3-ԳԵՏ-2», «ԱՍՀՆ-ՊՈԱԿ-ԷԱՃԱՊԶԲ-22/3-ԳԵՏ-3», «ԱՍՀՆ-ՊՈԱԿ-ԷԱՃԱՊԶԲ-22/3-Վ-2», «ԱՍՀՆ-ՊՈԱԿ-ԷԱՃԱՊԶԲ-22/3-Վ-3», «ԱՍՀՆ-ՊՈԱԿ-ԷԱՃԱՊԶԲ-22/3-Վ-4», «ԱՍՀՆ-ՊՈԱԿ-ԷԱՃԱՊԶԲ-22/3-ԵԽ-2», «ԱՍՀՆ-ՊՈԱԿ-ԷԱՃԱՊԶԲ-22/3-ԵԽ-3», «ԱՍՀՆ-ՊՈԱԿ-ԷԱՃԱՊԶԲ-22/3-ԵԽ-4», «ԱՍՀՆ-ՊՈԱԿ-ԷԱՃԱՊԶԲ-22/7-ԵԽ», «ԱՍՀՆ-ՊՈԱԿ-ԷԱՃԱՊԶԲ-22/7-ԵԽ-1», «ԱՍՀՆ-ՊՈԱԿ-ԷԱՃԱՊԶԲ-22/7-Վ» և «ԱՍՀՆ-ՊՈԱԿ-ԷԱՃԱՊԶԲ-22/7-Վ-1» ծածկագրերով «էլեկտրոնային աճուրդ» գնման ընթացակարգերը (այսուհետ միասին նաև՝ **Գնման ընթացակարգեր**): Աճուրդների ամփոփման և տվյալների ստուգման արդյունքում պարզվել է, որ տվյալ ընթացակարգերի չափաբաժիններից գերակշռող մասում առաջին տեղ զբաղեցրած մասնակից է հանդիսացել Ընկերությունը՝ առաջարկելով ոչ իրատեսական շուկայական արժեքից ցածր գնային

առաջարկներ: Նախարարությունը նշել է, որ Ընկերության կողմից ներկայացված հայտը թերի էր և չի համապատասխանել մրցույթի պահանջներին: Ընկերությանը տրամադրվել է շտկման հնարավորություն, սակայն համապատասխան շտկումներն Ընկերության կողմից չի կատարվել: Ուստի հայտը մերժվել է և Գնման ընթացակարգերը նորից վերահայտարարվել են: Ընկերությունը, 2022 թվականի հունվարի 19-ից ընդգրկված լինելով գնումների գործընթացին մասնակցելու իրավունք չունեցող մասնակիցների ցուցակում, կրկին մասնակցել է Նախարարության կողմից հայտարարված Գնման ընթացակարգերին:

Հաշվի առնելով վերոգրյալը՝ Նախարարությունը դիտարկում է, որ Ընկերության մասնակցությունը Գնման ընթացակարգերին հնարավոր է կրի միտումնավոր բնույթ:

Նախարարությունը Հանձնաժողովին խնդրել է բացահայտել Գնման ընթացակարգերի մասնակիցների միջև հնարավոր հակամրցակցային համաձայնությունների առկայությունը:

«Տնտեսական մրցակցության պաշտպանության մասին» օրենքի (այսուհետ նաև՝ **Օրենք**) 16-րդ հոդվածի համաձայն՝

1. Անբարեխիղճ մրցակցություն է համարվում տնտեսավարող սուբյեկտի ցանկացած գործողություն կամ վարքագիծ, որը հակասում է սույն օրենքին, այլ օրենքներին, նորմատիվ իրավական ակտերին կամ գործարար շրջանառության սովորույթներին, խախտում է տնտեսավարող սուբյեկտների միջև կամ վերջիններիս ու սպառողների կամ ձեռք բերողների միջև բարեխիղճության՝ ազնվության, արդարության, ճշմարտության և (կամ) անաչառության սկզբունքները:

2. Անբարեխիղճ մրցակցությունն արգելվում է:

3. Անբարեխիղճ մրցակցություն են սույն օրենքի 17-24-րդ հոդվածներում նախատեսված դեպքերը, ինչպես նաև սույն հոդվածի 1-ին մասի հատկանիշներին համապատասխանող այլ գործողությունները:

Վերոնշյալ իրավանորմերի համակարգային վերլուծությունից հետևում է, որ օրենսդիրը սահմանել է գործողությունը կամ վարքագիծը անբարեխիղճ դիտարկելու երկու եղանակ. մի դեպքում Օրենքի 16-24-րդ հոդվածներով սահմանված անբարեխիղճ մրցակցության մասնավոր դրսևորումները, մյուս դեպքում՝ Օրենքի 16-րդ հոդվածի 1-ին մասով ընդհանուր բնորոշմամբ սահմանված պայմանների, այն է՝

1. հակասում է Օրենքին, այլ օրենքներին, նորմատիվ իրավական ակտերին կամ գործարար շրջանառության սովորույթներին,

2. խախտում է մրցակիցների միջև կամ վերջիններիս և սպառողների կամ ձեռք բերողների միջև բարեխիղճության՝ ազնվության, արդարության, ճշմարտության և (կամ) անաչառության սկզբունքները առկայության ցանկացած դեպքում:

Կառավարության 2017 թվականի մայիսի 4-ի թիվ 526-Ն որոշման հավելված 1-ի 41-րդ կետի համաձայն՝ եթե հայտերի բացման և գնահատման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ ներառյալ այն դեպքերը, երբ հայտում ներառված՝ Հայաստանի Հանրապետության ռեզիդենտ հանդիսացող մասնակցի կողմից հաստատված փաստաթղթերը կամ դրանց մի մասը հաստատված չեն էլեկտրոնային թվային ստորագրությամբ, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով

ծանուցում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը: (...):

Կառավարության 2017 թվականի մայիսի 4-ի թիվ 526-Ն որոշման հավելված 1-ի 42-րդ կետի համաձայն՝ եթե սույն կարգի 41-րդ կետով սահմանված ժամկետում մասնակիցը շտկում է արձանագրված անհամապատասխանությունը, ապա նրա հայտը գնահատվում է բավարար: Հակառակ դեպքում տվյալ մասնակցի հայտը գնահատվում է անբավարար և մերժվում է, (...):

«Գնումների մասին» օրենքի 6-րդ հոդվածի 1-ին մասի 6-րդ կետի համաձայն՝ բացառությամբ «Գնումների մասին» օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում (...):

«Գնումների մասին» օրենքի 6-րդ հոդվածի 2-րդ մասի համաձայն՝ նույն հոդվածի 1-ին մասի 6-րդ կետում նշված ցուցակը, այդ թվում՝ ռուսերեն, հրապարակում է լիազորված մարմինը: Գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը պաշտոնական ընթացակարգ է նախաձեռնում գնումների բողոքարկման խորհրդում՝ առանց վճարի: Տվյալ մասնակցի կարծիքը լսելուց հետո գնումների բողոքարկման խորհուրդը որոշում է կայացնում մասնակցին սույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

«Գնումների մասին» օրենքի 37-րդ հոդվածի 1-ին մասի համաձայն՝ գնման ընթացակարգը չկայացած է հայտարարվում, եթե՝

1) հայտերից ոչ մեկը չի համապատասխանում հրավերի պայմաններին.

4) պայմանագիր չի կնքվում:

Կառավարության 2017 թվականի մայիսի 18-ի թիվ 534-Ն որոշման հավելված 1-ի 10-րդ կետի 2-րդ ենթակետի համաձայն՝ եթե առաջին տեղը զբաղեցրած մասնակցի հայտը գնահատվում է բավարար, ապա վերջինս հայտարարվում է ընտրված մասնակից, իսկ մյուս մասնակիցների հայտերը մերժվում են: Առաջին տեղը զբաղեցրած մասնակցի հայտն անբավարար գնահատվելու դեպքում գնման ընթացակարգը գնումների մասին օրենքի 37-րդ հոդվածի 1-ին մասի 4-րդ կետի հիման վրա հայտարարվում է չկայացած:

Տվյալ պարագայում Ընկերությունը, մասնակցելով Նախարարության կողմից 2021 թվականի դեկտեմբերի 2-ից 12-ը հայտարարված Գնման ընթացակարգերին, ներկայացրել է հրավերի պայմաններին անհամապատասխան հայտ և սահմանված ժամկետում համապատասխան շտկումներ չի կատարել, որի արդյունքում հայտը մերժվել է, իսկ Գնման ընթացակարգերը տվյալ չափաբաժինների համար հայտարարվել են չկայացած: Բացի այդ, 2022 թվականի հունվարի 19-ից ներառված լինելով գնումների գործընթացին մասնակցելու իրավունք չունեցող մասնակիցների ցուցակում, Ընկերությունը մասնակցել է Նախարարության կողմից 2022 թվականի հունվարի 21-ից 31-ը հայտարարված Գնման ընթացակարգերին և, առաջարկելով առավել ցածր գին, Գնման ընթացակարգերի չափաբաժիններից գերակշռող մասում զբաղեցրել է առաջին տեղը: Արդյունքում Գնման ընթացակարգերը տվյալ

չափաքաժինների համար կասեցվել են: Նման պայմաններում Ընկերության վարքագիծն առերևույթ պարունակում է անբարեխիղճ մրցակցության հատկանիշներ:

Օրենքի 92-րդ հոդվածի համաձայն՝ տնտեսական մրցակցության բնագավառում իրավախախտման համար Հանձնաժողովն իրավասու է տնտեսավարող սուբյեկտներին, պետական մարմիններին և դրանց պաշտոնատար անձանց տալու նախազգուշացում կամ նշանակելու տուգանք:

Օրենքի 93-րդ հոդվածի 7-րդ մասի համաձայն՝ անբարեխիղճ մրցակցության համար նշանակվող տուգանքի չափը կազմում է տնտեսավարող սուբյեկտի՝ տվյալ իրավախախտմանը նախորդող տարվա հասույթի մինչև հինգ տոկոսը:

Օրենքի 93-րդ հոդվածի 13-րդ մասի համաձայն՝ նախորդ տարում 12 ամսից պակաս գործունեություն իրականացրած լինելու դեպքում սույն հոդվածով նախատեսված տուգանքների չափը կազմում է իրավախախտմանը նախորդող, բայց ոչ ավելի, քան 12 ամսվա գործունեության ժամանակահատվածի հասույթի նկատմամբ սույն հոդվածում նախատեսված տոկոսը:

Հաշվի առնելով վերոնշյալը՝ Հանձնաժողովն անհրաժեշտ է համարում Ընկերության կողմից տնտեսական մրցակցության բնագավառում իրավախախտման հատկանիշների առկայությունը պարզելու նպատակով հարուցել վարույթ:


Հիմք ընդունելով վերոգրյալը և ղեկավարվելով Օրենքի 76-րդ հոդվածի 1-ին մասի 3-րդ կետով, 79-րդ հոդվածի 3-րդ մասի 1-ին կետով, 83-րդ հոդվածի 1-ին մասով, 42-րդ հոդվածի 2-րդ մասով՝ Հանձնաժողովը

Ո Ր Ո Շ Ե Ց

1. «Տումոն» սահմանափակ պատասխանատվությամբ ընկերության կողմից տնտեսական մրցակցության բնագավառում իրավախախտման վերաբերյալ հարուցել վարույթ:
2. Սույն որոշումն ուժի մեջ է մտնում ընդունման պահից:

ՆԱԽԱԳԱՀ

2022 թ. մարտի 1
Երևան



Գ. ԳԵՎՈՐԳՅԱՆ